

Kálaad ashúshwóógú Pwôl nyə á cilə buud ó Tesaloníka yé Isâ í dúgyá nə kálaad ashúshwóógú mə Pwôl shú Tesaloníka yí

Ja Pwôl nyə á ngə sá njəond yé ábée yí, nyə á kumə Tesaloníka a ngə zhu Filipî. Ja jəong wə nyə á fwə Də á cínəng yí. Nji, Oyúden bwə á leel zə fəm nyə, obúgula bwə mú sá ná bá Sílas bwə túbúg ibulú ibulú kə Berê. (Mis 17.1-10).

Nə ndée, ja Pwôl bənəh gwoong jé bwə á bə Atên yí, nyə á kənd Timotê ná a kág dúg nda mísəon ngə bə Tesaloníka ná. Timotê nyə á ka kə, a mú nyingə, kə bwəma nə gwoong Kərənt. A mú jaaw Pwôl ná obúgula wə Tesaloníka bwə ngə kə nə búgə shwóg, nji, búsə nə bíl ísə bwə ngə cəel mpu yí. Pwôl nyə á ka cilə bwo kálaad éga.

Sé bí nə ŋkul ci ná kálaad wəongú ji nə mənkwə ntúga:

- (1) Pwôl mə yé Zembî akíba nəcé məkál á mə bii má mə lwó ná obúgula wə Tesaloníka búsə nə kuú njəond í jélá nə bə yuug yí.
- (2) A nyingə báágulə jaaw bwo iséy nyə á tééd yí, a ngə ntág cəel ná bənónj bwə nyingəg dúgya (1.1–3.13).
- (3) A bándúlə bwo ná bwə wáág ŋkul nə ngələ kwambulə kuú njəond wánj (4.1-12).
- (4) A mú námə ka jíguli bwo sá í dúgya nə shwiy nə zíyé mə Yésus-Krîst yí (4.13–5.11).

(5) A ka kə shínal kálaad nə baalé məcwûŋ nə məbədə (5.12-28).

Məbədə

¹ Mə Pwôl wə mə cîlê bî kálaad éga, sánónŋ Silvê nə Timotê. Sá mə cîlê bî *Dɔ́ á Tesaloníka, Dɔ́ dúsé Dɔ́ mə Zembî Sóónŋú bá Cwám̃ba Yésus-Kríst yí. Zembî kə sá bî mpaam, kə sá námə nə bî cúgəŋ nə shɛɛ.

Obúgula wâ Tesaloníka bwá á bə nə fwámé búgá

² Sá ngə yə Zembî akíba ja jêsh shú dún bî bêsh, sá anŋê nə bwele yəw ngələ wá bî mājəgula mósúd.

³ Sá ngə bul téduga bî mísh mə Zembî Sóónŋú íshéd nəcé: búgá jín í cúgé ná á shílág; cɛɛlí jín nda bə á shwánág; bwándulə bî ngə bwánd Cwám̃ba íshé Yésus-Kríst nə búgá yí wúsə álal-ŋkul. ⁴ Yé bwááŋg Zembî mə céel wá, sá ngə téduga bî ntó, sá ngə mpu ná Zembî nyə a féesh bî. ⁵ Jí ntó. Jɔ́ɔ́ Kéel sá á ngə bwiŋŋ bî yé nyə a shígé bə nji iciyá í mpu; Nkénkê Shíshim nyə á ngə lwándulə iciyá byəŋŋú nə ŋkul mə Zembî, sá ngə *búgula nə milâm mísú myêsh. Kuú njəond sá á ngə kyey yí, í á bə shú mánywa mún, bî a shí dúg wə.

⁶ Bî a dúg, bî mú námə sá nda sá, sá námə nda Cwám̃ba, bî lág Jɔ́ɔ́ Kéel nə məshusug mə á ngə zhu wə Nkénkê Shíshim má, í njúl ná bî á bə *íncwaw í ntug dí ná liid. ⁷ Sâ jəŋŋ í mə sá ná obúgula bêsh wâ Masedwân nə bəŋŋ wâ Akayî bwé mú də ŋwa yuug nə bî.

⁸ Kéel mə Cwám̃ba í á mə lás nûŋ bídí nda kwólóŋ;

1:1 Silvê: 2Kr 1.19; 2Te 1.1; 1Pr 5.12 Timotê: 1Kr 4.17 Tesaloníka: Mis 17.1 **1:2** 2.13; Flp 1.3; Kol 1.3; 2Te 1.3; 2.13 **1:3** 5.1-2
1:4 2Te 2.13, 16 **1:5** 1Kr 4.20 **1:6** Mis 17.5-9; 2Kr 6.10; 2Te 3.7, 9 **1:8** Rom 1.8

lân í má kyey kál jêsh ná bi mú fwámé óbúgula ó Zembî; mæ ngæ ci ná kál jêsh, kú ná bæ nji Masedwân næ Akayî. Í cúgé ná nyingæ bæ sâ sá bwíngug. ⁹ Jí ntó. Buud bwáméfwó bwé ngæ jaaw nda bí á má lég sá fwámé lég ná; ná bi a má yîl mîlâm ózembî ó áyadúg dî, kænd wó Zembî shú ná bi séyúg næ Zembî jí fwámé Zembî yé, Zembî á kuwô. ¹⁰ Bwé ngæ námá jaaw ná bí ngæ bwánd Mwân yó ná a bá zhu gwôw, Mwân yé Yésus nyáméfwó nyæ a gwûmushi yé, nyæ wé nyæ a má sá ná shé fáámugí næ mpimbæ má Zembî.

2

Iséy Pwôl nyæ á sêy Tesaloníka yí

¹ Bwaang, ngaá né biméfwó bi mæ mpú ná njæond wúsú sá á zæ bídí yí í áshígé bæ ná sá á fánda zæ ngæ kyey ntó? ² Bi mæ mpú ná sá á zæ wósos bídí sá má fwo bul jug, sá á bwæma næ cúgé Filipî. Nji, Zembî wúsú nyæ á yæ sá injkán í á jæla yí. Injkán byæng wó í á sá ná, mizhízhín mí á tæem ngæ lúmbuli næ sá mæzhíí mêsh íí, sá báá sá á ngæ námá bwíng bí Jǝǝ Kéel má Zembî. ³ Bi má jælá næ mpu cínæng ná sá a shígé ngæ bwíng bí Kéel dængú næ mitédúgá mí íwushî, sá áshígé ngæ sêy næ mîlâm mîmbá, kú sá ísêy í mákán. ⁴ Í yidá bæ ná, Zembî nyæ á fwo faas sê ná ndeé a mú magulæ sê, a mú yæ sá Jǝǝ Kéel ná sá kág ngæ bwíng. Ntó, lésú sá á ngæ lás yí, sá a shígé ngæ lás wæ mbií á ná buud bwé fáágug sê; sá á ngæ yida lás mbií á ná Zembî gwágúg sê nywa, nyæ muud mæ dæ dúg mitédúgá myâ mîlâm yé.

1:9 Yuá 17.3; Mis 14.15

2:2 Mis 16.19-24; 17.1-9

1.11; Gal 1.10; Ifz 3.2

1:10 5.1-2, 9; Rom 5.9

2:3 2Kr 4.2

2:1 1.5, 9

2:4 Zhe 11.20; 1Tm

⁵ Haaw. Bi mə mpú ná sá a shígé bwēle jwángulə múúd nə iciyá í mpu, sá nda sá mísóólúgú mí ncwanǵá, Zembî ji wúshined. ⁶ Sə áshígé ngə sɔ́ gúmá tɔ́ bídí, tɔ́ bóól búud dí. ⁷ Í njúl ná sá á shí bæ nə zhií ná sá zég lwó bí mpêl. Ngaá nə *buud ɔ́ lwámá ɔ́ *Kríst bí nə ŋkul lwó búud mpêl? Nji, sá á yida ŋwa bí nə lâm mácey nda nyɔ́ŋgú má ŋkáŋgúlə bwân yé. ⁸ Matag mɔ́ŋg má á sá ná, sá á tɛem yə bí Jɔ́ɔ́ Kéel, sá á ngə ji jíg ná sá má yə námá bí icug bísú yá sáméfwó, nəcé bi á shîn zə bæ sá wəalâm.

⁹ Bwaanǵ, ngaá bí ngə téduga wádúgálə sá á ngə wáduga sêy yí. Sá á ngə cúndə bí Jɔ́ɔ́ Kéel sáméfwó sá dúgə sêy bulú nə mwásə shú ná tɔ́ muud ŋgwûd nə ŋgwûd nda ŋkêny mbag wúsú. ¹⁰ Bí bí owúshined, Zembî námá wúshined nə kuú njɔ́nd sá á ngə kyey nə bí obúgula yí í á bæ kuú njɔ́nd Zembî mə céel yí, kuú njɔ́nd á otútəlí, nda nə sá á jumúg. ¹¹ Bi mə mpú námá ná sá á ngə ŋwa muud yêsh a bídí nda sɔ́ŋgú má dɔ́ ŋwa bwân ná. ¹² Sə á dɔ́ cwîny bí, dɔ́ ləl bí mɛnyúul, sá dɔ́ báásulə bí ná bí kyéyug kuú njɔ́nd Zembî mə céel yí. Bi má jəlá nə cugə ntó nəcé Zembî nyə á jəw bí ná bí bág buud ɔ́ Faan dé, ŋwa dán kəw nyádí gúmad.

¹³ Sə ngə námá yə Zembî akíba nə gúl sâ; jí ná, ja bí á gwág Milésú mí Zembî sá á bwiŋg bí myá, bí á lég myo nda mísə ná. Bi a lég myo ná mísə Milésú mí Zembî, kú bæ kéel yá buud ɔ́ shí ga. Milésú mí Zembî myɔ́ŋg wá mí ngə sêy bí obúgula dí ícugud.

¹⁴ Nə ndéé bwaanǵ, bi a má sá námá nda mədɔ́ má

Zembî mäsá Yudeá má ngə bɛ Yésus-Krîst má. Buud ó lɔɔm bɛn bwə á má námə wáámɓ bî nə ifumuga námə nda *Oyúden bwə á wáámɓ mádɔ mɔɔngú nə ifumuga ná.

¹⁵ Oyúden bɔɔng bwə á gwú Cwámɓa Yésus-Krîst, bwə gwú *buud ɔ mícúndá, bwə á jág námə bul wáámɓ sə nə ifumuga. Zembî nyə angɛ nə gwág bwo nywa, bwə ngə lúmbɔli nə buud bɛsh. ¹⁶ Bwə ngə ntágulə sê ná sə nda bwiing íkûl ishús Jɔjɔ Kéel, bwə acéélé ná íkûl byɔɔng í dúgúg cug. Sálə bwə ngə sá ntó yí, bwə ngə casulə *sám wáj ná í báɓ ncindî. Bwə á má ka bwəma nə mpimbə má Zembî.

Pwôl nə yéesh ná a ká dúg ókrîsten wâ Tesaloníka

¹⁷ Bwaang, sə bân jisú kóómb di, tɛem bə ná sə á má béégya nə bí fúfwálá mísh mäsú nda ná dúg bí, milâm mísú myáá mí leedyá nə bî. Ntó, nda sə á bul bə nə məma yéesh ná sə nyíngəg dúg bî ná, sə á ngə yáág ná sə má zə nûŋ bídí. ¹⁸ Búbálé sə á má yáág ɛkí ja ngwûd ɛkí ija íbá ná sə má zə dúg bî, ná ndéé mə Pwôl; ká, *Sátan nyə a má ntágulə ná sə nda zə. ¹⁹ Ye bî ampúyé ná bî wə ngə sá ná sə ngəg nə bwánd Cwámɓa Yésus nə búgá? Ngaá məshusug mäsú má ngə zhu bídí? Bî wə jí *tûm gúmá sə má bá ngə bəgəwa ná ndí Yésus dí míshúd ja á bá nyíngə zə yí. ²⁰ Mpugá ná bî wə bí sə sâ gúmá, bî wə bí sə sâ məshusug.

3

Pwôl nyə á kənd Timotê Tesaloníka

2:15 Mis 2.23; 9.23, 29; 13.45, 50; 14.2, 5, 19; 17.5, 13; Rom 11.28; 2Kr 11.23-29 **2:16** Mat 23.31-33 **2:17** 3.10 **2:19** 1Kr 9.24-25; Flp 4.1; 2Te 1.4

¹ Zhúgúlá zhúgúlâ, nda sá áshígé ná nyingə jísəw ngələ ji nda gwáduga bî ná, sá á dúg ná í nywa ná sá lúgúg fwó Atên. ² Sə mú nti *mínycəhə wúsú Timotê muud bá Zembî bwə ngə námə sêy sêy bwiingúlə Jəjə Kéel yé. Sə mú nti nyə ná a zág sá ná bî bág nə inkáŋ búgə jínúd, zə cwîny bî. ³ Haaw. Í á jii ná bî bág nə inkáŋ búgə jínúd shú ná məntágula mə nda tí múúd məkuú shí. Biméfwó bî mə mpú ná məntágula mání məsə dúsú kəw Zembî nyə á yə sá yí. ⁴ Ngaá ná ja sá á bə nûŋ bídí yí sá á shí bwey ngə jaaw bí ná sá é bwəma nə məntágula? Ntó námə wá í mə bə éga, bî mə mpú ntó. ⁵ Ná ndeé, nda mée mə áshígé ná nyingə jísəw ngələ ji nda gwáduga bî ná, mə á nti Timotê ná a zág wámbulə nda bí ngə cugə cug búgə jín ná. Mə á ngə bæemb ná Mása məbwəbúlán nyə a bá bwówulə bí ná ndeé njugú sá á ŋwa yí mú yə íyíy-yíy.

⁶ Ná ndeé, Timotê mə wós wa wúlə nûŋ bídí. A mə zə nə sá jəjə mákəl ná bí ngə ná kə shwóg nə búgə jín nə cəlí jín. A jaaw námə sá ná bí ngə ná téduga sá tédúgálə ányunywaâ, bî njúl nə məma yéesh ná bî mə dúg sá, nda sá bí námə nə yéesh ná sá mə dúg bí ná. ⁷ Gwə wá jí ná, bwaanğ, məfúfə nə məbwəbúlán mə tɛm ngə ntágulə sá, mənyúúl mə mə bul nyingə lal sá nə gwádúgálə búgə jín. ⁸ Sə mə nyingə cugə ja gaád nəcé sá mə gwág ná bî mə nada nə Cwamba. ⁹ Sə bí bul bə nə məshusug nə bí mísh mə Zembî íshéd, nda ná mpu bímbí sá bí nə ŋkul yə nyə akíba yí. ¹⁰ Sə ngə jəgula nə Zembî ntə mínji. Bulú nə mwásə sá ngə jəgula ná shé nyíngəg dúgya, sá zág lwándulə sá í ngə

3:1 Mis 17.15 **3:2** Timotê: 1.1 **3:3** Ifz 3.13; 2Te 1.4; 2Tm 3.12

3:4 Mis 14.22 **3:5** Flp 2.16 **3:6** Mis 18.5; 2Te 1.3; 1Tm 1.5; Flm 5-7; Gal 5.6 **3:7** 2Te 1.4 **3:10** 2.17

ná fúfə bí búbə dí yí.

¹¹ Sóónǵú íshé Zembî nyəméfwó bá Cwámba íshé Yésus bwə sáág ná zhií zələ nûŋ bídí í bág sá ná wan wan. ¹² Bí ngə ciila mpédúgá nyín, bi ngə námá cɛɛl bóól búúd bēsh. Cwámba sáág ná cɛɛlí jəŋg í ngəg nə yáág yáágúg námá nda cɛɛlí sá ngə cɛɛl bí yí. ¹³ A sáág ná milám mí bág nda ŋkúnkulə bí, bi bág bə nə kuú njəond Zembî mə cɛɛl yí, kú nə sâ á jumúg mísh má Sóónǵú íshé Zembî dí ja Cwámba íshé Yésus bənôn buud bé bēsh bwə bá zə yí. Amen.

4

Fwámé kuú njəond

¹ Ná ndéé bwaanǵ, sá á shí lwó bí kuú njəond Zembî mə cɛɛl yí, bi mú námá ngə kyey wə. Ná ndéé, kəgá nə kuú njəond wəŋg shwóg ngə yáág yáágúg; sá ngə bándulə bí ntó jínə mə Cwámba Yésus dí. ² Bi mə mpú məcwûŋ sá á cwîny bí nə ŋkul mə Cwámba Yésus má. ³ Ŋkúmba sâ Zembî ngə jii yí jí ná bi cágəg mbií á cɛɛl yí. Kwanzəgá jaŋga. ⁴ Muud yēsh cágəg nə nyúúl nyé* mbií Zembî mə cɛɛl yí, ŋwa nyə nə məjilə; ⁵ kú bɛ bów-bôw íyéesh nda buud bwə ampúyé Zembî wá. ⁶ Muud nda nyúg *mínyəŋh na sâ nííd, nda ntə mínji. Nəcé Cwámba mə də kunda búúd ísâ ínííd; sá á shí bwey də jaaw bí ntó, sá ngə námá nyingə báásulə jaaw bí ntó. ⁷ Mpugá ná njúwúlú Zembî nyə a jôw shé yí í áshígé bə ná shé ngəg nə kə shwóg ngə sá ísâ í áduɗanâ; í á yida bə

3:12 Gal 6.10 **3:13** 5.1-2; Flp 1.10 **4:1** 2.13; Kol 1.10; 2Te 3.6

4:3 5.23; 1Kr 6.13; Heb 10.10 * **4:4** Bóól bwə ci na ná: «Muud

yēsh cágəg nə yé múdá». **4:7** 4.3; 1Pr 1.15-16

ná shé cùgæg mbií á céel yí. ⁸ Ná ndéé, muud mə bən məcwûŋ məga yé nyə abáné múud, á bən Zembî muud ngə yə bí Nkèŋkê Shíshim yé.

⁹ Shú sâ í dúgyá nə cēlí á mpédúgá omínyonû yí, í ajíyé nə mə cílэг bí, nəcé mə mpú nə Zembî nyəméfwó nyə á má jííḡuli bí nda bí má jálá nə ciila mpédúgá nyín ná. ¹⁰ Bí ngə ntág námə bwey lwóya cēlí jəonḡú nə omínyonû ó íshé bēsh wā Masedwān yēsh. Bwaanḡ, sə má bándúlá bí ná bi kóg nə cēlí jəonḡ shwóg ngə yáág yáágúḡ, ¹¹ bulagá sḡ cug mətəla, muud bul sḡ ná a dúgúḡ nji sâ í dúgyá nə nyə yí, sḡ ná a séyúḡ nə məbwə mé nda sə á cwíny bí ná. ¹² Ságá ntó shú nə bi cùgæg cug í é bə nə məjilə mísh má buud bwə cùgé *Dḡ dí wá; bí nda sá nə bóól búúd bwə ngəḡ nə nkény mbag wán.

Zembî mə bá gwûmushi omínyonû ó íshé

¹³ Bwaanḡ, sə acéélé nə bi dúḡ jág sâ í dúgyá nə okrísten bwə á má kə ígwəd wá yí. Í jii nə bi dúḡ mpu, shú nə bí kú də bə nə shúsúlú shúsúlú nda buud bwə áḡḡ nə bwánd nə búḡə wá. ¹⁴ Shé ngə *magulə nə Yésus nyə á yə a mú nyingə gwûm, shé máḡuləḡá námə ná, bəonḡ bwə á yə bwə ngə *búḡula Yésus wá, Zembî mə bá gwûmushi bwo a mú kə nə bənónḡ Yésus.

¹⁵ Gúl sâ sə ngə jaaw bí Cwám̃ba nyə a ci wə ga: ja Cwám̃ba mə bá nyingə zə yí, shé buud mə bá bə shé ngə ná dúgya wá, shé ábúlé kə shwóg,

4:8 1Kr 6.19-20 **4:9** Zhe 31.33-34; Gal 6.10; Ifz 5.2 **4:10** 2Te 3.4 **4:11** 2.9; Ifz 4.28; 2Te 3.10, 12 **4:12** 1Kr 5.12-13; Kol 4.5
4:13 5.1-2; 1Kr 15.51-52 **4:13** 1Kr 15.18-19; Ifz 2.12 **4:14** Rom 14.9; 1Kr 15.3-4, 12, 20 **4:15** 1Kr 7.10, 25

lúgə bəəŋg bwə mə yə wá mpəsə. ¹⁶ Nəcə í bá bə ná, buud bwə bá gwág kəl ngə cúndə, wúl kúkúmə *wəéŋgəles ngə wééshuli kəl, laag mə Zembî ngə lás, Cwám̃ba nyəméfwó mú shulə wú jon dí, buud bwə á yə bwə njúl búúd ɔ *Kríst wá bwə mú tééd gwûm. ¹⁷ Bwə ká shîn gwûm ntúni, shé buud mə bá bə shé ngə ná dúgya wá, shé mú sɛɛŋgya nə bwo ná ndéé sónónj mú ŋkâŋ kə mĩŋkúdúd kə bwəma nə Cwám̃ba nûŋ mĩŋgúlúd; sónónj sə mú ji kandugə á kandugə. ¹⁸ Dugá wíya ŋkul mílámúd nə iciyá ini.

5

Muud nyə ampúyé jwów Cwám̃ba mə bá zə yí

¹ Bwaanŋ, í ányíngáyé jii nə mə cílɛg bí shú sâ í dúgyá nə məfwála nə ija ísâ í bá sîy yí. ² Nəcə biméfwó bi mə mpú nə sánj sánj nə jwów mə Cwám̃ba í bá zə wós nda júwâl í dɛ zə mpwó-bulú ná. ³ Buud bwə bá ngə ci ná: «Húúŋ! A m̃añ mətəla e! Kú nə tɔɔ sâ í kánd múúd lâm gwów!» Í bá bə, buud bwə ngə lás ntó, byéndí í ó wós bwo məseegya, námə nda məcɛy mə minú mə dɛ wós múdá á bum məshüga ná. Bwə ábulɛ faam. ⁴ Ká, bwaanŋ, bi báá cugé yídúgúd*. Jwów dɔəŋgú í ábulé wós bí nda júwâl. ⁵ Bi báá búsə bwán ó m̃añkenya bi bēsh, bwán ó mwásá. Shé cugé búúd ɔ bulú, búúd ɔ yídúgú. ⁶ Nda jí ntó ná, shé ajéláyé nə kə ígwəd nda bóól búúd bwə

4:16 1Kr 15.23 **4:17** Yuá 12.26; Rom 5.17; Flp 3.20 **5:2** 1.2-3, 10; 2.19; 3.13; 5.23; Mat 24.36; Flp 4.5; 2Te 1.7, 10; 2.1-2 wós nda júwâl: Mat 24.43; 2Pr 3.10; Mbá 3.3; 16.15 **5:3** Zhe 6.14-15; Mat 24.39 * **5:4** Buud bwə afwóyé magulə Yésus wá bwə ngə ŋkúnkulə nə cug kú mpu shwóg kú mpu shug: búsə yídúgúd. **5:5** Rom 13.11-12; Ifz 5.8-9

ngá kə ígwád ná; shé má jəlá nə ji ŋkasə, shé də cunal íyéesh íshé.

⁷ Nəcə ná, buud bwə də kə ígwád wá bwə də kə ígwád íbulû, ɔŋgule də fudə nə məlwəg íbulû. ⁸ Shé bāŋ buud ɔ mwásə, shé dŋgá cunal íyéesh íshé. Ntó, í ji ná shé ŋwág búgə nə cɛlí búdal íbəd dí tən nda búduga í ŋkwánz ózimbi bwə də bwáád bəd dí yí, shé ka ŋə bwánd nə búgə ná Cwámba mə bá sá ná shé fáámug nə intúgúlí, bwándúlə wəŋgú í bə shé nda tūm ŋkwánz zimbi mə də búdal lúúd yí. ⁹ Nəcə ná, Zembí nyə a shígé féesh shé ná shé zág yida bwəma nə mpimbə jé; nyə a féesh shé ná shé dŋgúg cug zhí mə Cwámba íshé Yésus-Krist dí. ¹⁰ Ngaá ná Yésus wəŋg wə nyə á yə shwíy dəsú? Haaw! Nyə á yə shú ná sənəŋ sá cŋgəg, tɔ shé má ji ŋkasə, tɔ shé má nyiŋgə kə ígwád. ¹¹ Ná ndéé, dŋgá sá ná, bóól wá bóól ŋkúl mílámúd, bóól sá ná bóól búgə í lálug, nda bí mú ŋə bwey sá ná.

Məcwûŋ mâ məzhúgúlâ

¹² Bwaŋg, sə ŋə námə ci nə bí ná, bəŋg bwə tál bí shwóg bwə ŋə wáduga ŋə cwíny bí cug krísten dí wá, dŋgá ŋwa bwo nə məjílə. ¹³ Dŋgá yə bwo gúmə, bí cɛl bwo nə fwámé cɛlí nəcé séy bwə ŋə sêy yí. Cugəgá ná shɛɛ mpədŋgá nyín.

¹⁴ Bwaŋg, sə ŋə yáág nə bí ná bí dŋg lás nə bəŋg bwə acéélé sêy wá; bí sá ná bəŋg búśə nə ŋkwə wá bwə wíínzhug mənyúul, ná bəŋg búśə nə iləm wá məkuú mə tówúg shí; bágá nə jísów, də jísow búúd bēsh. ¹⁵ Bí ó bɛy. Muud nda bweel məbôw ŋgwól mə

5:8 Ifz 6.11-17 **5:9** 1.10; 2Te 2.14 **5:10** 4.14; Rom 14.8-9

5:12 1Kr 16.15-18; 1Tm 5.17 **5:14** 2Te 3.6, 11, 15 **5:15** Rom 12.17; Flp 1.10

sá nyə má; yidagá dɛ sɪya mǎnywa mpádúgá nyín, dɛ námá sá búúd bēsh. ¹⁶ Dúgá bə nə məshusəg ja jēsh, ¹⁷ dɛ jəgɔla nə Zembî kú káád, ¹⁸ dɛ yə Zembî akíba nə məfwála mēsh mâ cug jín. Bí buud bí básé búúd ɔ *Kríst Yésus wá, isâ Zembî mə jíí ná bi dág sá wó íni.

¹⁹ Kúgá ntágulə ná Shíshim má Zembî bág kú sêy séy jé.

²⁰ Kúgá bæeg mpyēny íciyá í *búúd ɔ mícúndá ó Zembî.

²¹ Dúgá faas ísâ byēsh, bí dɛ bii nji byəŋg í nywá yí.

²² Bi ɔ káálúgá nə mbií məbôw wēsh wúsə nə ŋkul shweenzh bí yí.

Ibwádán nə məbádá

²³ Zembî á mpwogé nyəméfwó ká fúb bí ikóómb byēsh; ká baagulə bí ikóómb byēsh, nə *shíshim, nə *jím, nə nyúúl, byēsh í bág bə kú nə sá á jumág ja Cwám̄ba íshé Yésus-Kríst mə bá nyingə zə yí. ²⁴ Muud ŋgá jôw bí yé ji abúgúlág; nyə wó mə bá sá sóólúgú wəŋg.

²⁵ Bwaang, dúgá jəgɔla nə Zembî shú dúsá.

²⁶ Kúlálúgá mə bwááng bēsh məkúlulə mə buud ó Zembî. ²⁷ Mə jəgɔla nə bí jínə mə Cwám̄ba dî ná bi lóg bwááng bēsh kálaad éga. ²⁸ Cwám̄ba íshé Yésus-Kríst ká sá bí mpaam.

5:16 Flp 4.4 **5:17** 5.25; Luk 18.1; Rom 12.12; Ifz 6.18; Kol 4.2

5:18 Ifz 5.19-20 **5:19** Ifz 4.30 **5:21** 1Kr 14.29; Ifz 5.10; 1Yn 4.1

5:23 5.1-2; 2Kr 13.11 **5:24** 1Kr 1.8-9; Flp 1.6; 2Te 3.3 **5:25**

1.2-3; Rom 15.30 **5:26** Rom 16.16 **5:27** Kol 4.16

Kálaad Zεmbî : Sə́ á Gúgwáan New Testament in Makaa

copyright © 2014 Wycliffe Bible Translators, Inc.

Language: Makaa

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Makaa

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022
d1606f4a-0ada-5be8-9b44-23b40e4b3495